

開放文學 – 歷代筆記 – 夷堅丙志 第十一卷

李鐵笛 饒州道士曹與善·政和中·以道學上舍·貢於京師·與河北李陶真道人相識·李好吹鐵笛·蓋放浪不羈之士也·曹後歸鄉里·宣和三年·為神霄宮副·李從京師來見之·有一馬·置於四十里店民家·時以薦福寺為宮·每吹笛宮門·則馬不煩僕御而自至·往來月餘·一旦告別·會曹入城·李來不相值·彷徨良久·顧道童周永真·索筆硯·題詩壁間·一別仙標歷四春·神霄今復又相親·炉中氣候丹初熟·匣裡光芒劍有神·未駕鸞輿朝碧落·且將蹤跡傲紅塵·乘風暫過羌廬去·異日相期拜紫宸·書其後曰·潛真散·人瀟湘訪曹副宮不遇留題·方擲筆·曹適歸·永真以告·而李已不知所在矣·明年·一客白袍皂纓·甚古·入曹之室·視壁間字·問誰所書·永真言李陶真先生也·客笑曰·九百漢·亦索筆書對壁·自稱道人李抱一·雲·一粒金丹續命基·算來由我更由誰·神龜移入雲端去·彩鳳搏歸地母騎·溟滓浪中求白雪·崑崙山裡彩瓊枝·只消千日工夫足·養個長稜八角兒·書畢即去·後三年·又有姓崔者來·讀二詩大笑·時永真亦在傍·崔瞪眊移時·咄曰·汝師曾食肉乎·曰·然·曰·非汝買與之耶·安得如是·連掙其耳·復擲之仆地·徑趨出·初永真性蒙鈍·及是覺聰明頗開·後易名彥昭為道士·二李之詩·嘗刻石於宮·靖康中·神霄廢復為薦福·石為僧所毀·曹與善至八十五歲·幹道四年方卒·周說

朱氏乳媪

鄉人朱漢臣·宣和中為太學官·其乳母死·殯於僧庵·及還鄉里·不暇焚其骨·朱妻弟李元崇景山·入京舍客館·夢老婦人彷徨室中·明夜又夢·且泣訴曰·我朱家乳母也·不幸客死·今寄某坊某庵中·甚不便·願舅挈我歸·李白·庵中棺柩不少·何以為志·曰·在庵之西偏·塚上植竹兩竿·南者長而北者短·柩上所題字尚存·索之當可得·李既覺·不復寢·急取紙筆書之·遲明往訪·尋至其處·如所言·以告守僧·出柩而焚之·裹遺燼付一僕·僧因言此中瘞者以百數·初來時·每夜聞歌叫喧謔聲·終則多歎泣·至明·所供器或東西易位·月夕尤甚·殆不安寢·今久矣·亦不復畏也·李歸番陽·未至之三日·朱氏夢媪來·有喜色·曰·久處異鄉殊寂寞·賴李二舅挈我歸·將至矣·一家皆為哀歎·遣人迎諸涂·盛備具以葬焉·

華嚴井鬼

劉彥適·登第歸·與其弟設水陸齋於永寧寺泗州院·會散·宿院中·闍黎僧繼登·督其徒收拾供具·見客戶不閉·責問僮奴·皆雲二劉掩關寢久矣·秉燭巡視·室空無人·衾褥亦不見·疑為它往·而三門又已扇鑰·登吐曰·必華嚴鬼也·亟命取鈴杵往訪焉·先是西廊華嚴院一行者·合鑿於院後井旁栗樹上·時出為物怪·繼登過西邊·得遺被·及華嚴牆畔·又得一履·院僧熟睡·排闥而入·徑趨井所·二劉果對坐井上·互舉手推挹·為遜讓之狀·即扶以歸·既醒·扣其故·曰·終夕倦局·恰登床欲寢·而行者來傳闍梨之意·雲夜尚早·正煎湯相待·幸可款語·遂隨以行·了不知牆壁之留礙·俄聞婦人歌笑聲·朱門華屋·赫然煥耀·或導使入門·念兄弟同行·義難先後·方相搗避忽冥然無所睹·非師見救·皆墮井死矣·彥適·字立道·

施三[女更]

州民張元中·所居通達·與董梧州宅相對·董氏設水陸·張夢女僧施三[女更]來·曰·久不到君家·今日董董知郡招喚·以眾客未集·願假館為須臾留·張記其已死·不肯答·又曰·曩與君買婢·君約謝我錢五千·至今未得·我懷之久矣·非時不得至此·幸見償·張寤而惡之·明日買紙錢一束·焚於滄津湖橋下·夜復夢曰·所負五千而償不用百·儻弗吾與·將投牒訟君·是時勿侮也·張不得已·如其所須之數·舉以付寺僧·使誦經·既而歎曰·數與鬼語·更督無名之債·吾豈不久於世乎·然其後八年乃死·胡匠賽神

番陽民俗·殺牲以事神·貧不能辦全體者·買豬頭及四蹄享之·謂之頭足願·木工胡六病·其妻用歲除日具禱賽·置五物釜中·俟巫者·會節序多祀事·巫至昏乃來·妻遣女取饌·奔而還·告母曰·母自往取之·兒欲視吾父·色殊怖沮·母至廚發羶舉肉·亡其一蹄矣·倉黃不暇究·但別買肉以補之·既罷·女始言適欲入廚·見黑物宛宛·徹屋上下·了不能辨其狀·故驚而出·後數日胡匠死·

趙哲得解

鄱陽縣吏李某·幹道四年七月·夢出城過東嶽行宮·道上見故同列·抱文牘從中出·告曰·此本州今秋解試榜·來書岳帝·李問吾所親及鄉里何人預薦·曰·但有君巷內趙哲一人耳·夢中思之無此子·以為疑·其人曰·趙醫秉德之子也·李曰·此吾近鄉·熟識之·渠名中興·非哲也·曰·吾言不妄·君當自知之·遂去·時此吏死數年矣·李異之·出詣趙·欲話其事·遇諸涂·趙曰·吾已納保狀·夜夢人相勸雲·朝廷方崇太平之業·而予尚名中興·又與國姓同不可·能易之乃佳·吾甚惑此夢·今將謀之朋友·李大笑·具道所見·使改名哲·且曰·子若薦送·吾以女嫁子·是歲哲果登名於春官·李遂納為婿·

白衣婦人

宣和中·鄉人董秀才·在州學·因如廁·見白衣婦人·徘徊於前·問其故·曰·我菜圃中人也·良人已沒·藐然無所歸·董留與語·且告以齋舍所在·至夜·遂來並寢·未幾得疾·同捨生或知之·以白教授·教授造其室·責之曰·士人而為異類所馮·何至此·扣其所有·曰·但嘗遺一衫服·取胝之·穢而無縫·命投諸火·遭諸生蹤跡焉·一老圃曰·向者小兒牧羊·一牝羊墜西廊井中·不可取·今白衣而出·豈其鬼歟·呼道士行法·咒黑豆投於井·怪乃絕不至·然董亦死·

錦香囊

德興縣石田人汪蹈·紹興十六年·延上饒龔滂·為館客·書室元設兩榻·龔處其東·虛其西以待外客之至者·秋夜·龔已寢·燈未滅·覺西榻窸窣聲·俄有婦人揭帳出·冠珠翹·瑤環玉珥·奇衣袿服·儀狀麗·圖畫中所未睹·徑前相就·龔喜懼交懷·肅容問之·曰·君何人·何自至此·曰·中丞不須問·龔曰·吾布衣也·安得蒙此稱·曰·君明年登名鄉書·即擢第·前程定矣·遂留宿·雞初鳴·灑泣求去·解所佩錦香囊為別·曰·謹秘此物·無得妄示人·苟一人見·即不復香矣·過四十年·當復來取之·戀戀良久·攜手出戶·仰視天漢·指一大星曰·此我也·方諦觀次·有物如白練·自星中起·下垂至地·婦人即登之·既去丈餘·回顧曰·郎亟入室·脫有問者·勿得應·違吾言·將致大禍·遂冉冉上騰而滅·龔凝佇詹慕·不忍去·忽思向所戒·急歸閉關·未一息·聞人擊戶·拒不容·怒罵而去·至明·視所遺囊·文錦爛然·非世間物·中貯一合如玳瑁·以香實之·芳氣酷烈·不可名狀·具以語汪翁·汪婿王慶老·屢求觀·不得·乘醉發筭偷玩·香自此歇矣·龔果自此登科·所謂中丞之祥·未知信否·予族人紱代龔為館·見汪翁道此·

牛疫鬼

紹興六年·餘乾村民張氏家已寢·牧童在牛圈·聞有扣門者·急起眊之·見壯夫數百輩·皆被五花甲·著紅兜鍪·突而入·既而隱不見·及明·圈中牛五十頭盡死·蓋疫鬼雲·

牛媪夢

樂平縣杭橋市·染工程氏·夢老媪來曰·負君家錢若干·除已償還外·猶欠若干·幸餘一屋·可以充數·今別君去矣·再拜而辭·既寤·聞一牝牛死於空屋中·剝貨得錢·如夢告之數·

程佛子

德興縣新建村·居民程氏·屋後二百步有溪·程翁每旦·必攜漁具·往踞蹠石而坐·施罔罟焉·年三十·時正月望·夜夢人告曰·明日亟去釣所·當獲否舟魚·覺而異之·雞鳴便往·久無所睹·自念夢具欺我歟·忽光從水面起·照石皆明·掬水灌面·澄心

諦觀·但有大卵石·白如雪·光耀燦爛·一舉網即得之·持以歸·婦子皆驚曰·爾遍身安得火光·取置佛桌上·一室如晝·妻窺之·乃如乾紅色·頃刻化為帶·長三尺·無復石體·益驚異·炷香欲爇間·大已如楹·其長稱是·懼而出·率家人列拜·俄聞屋中脰膊聲·穴隙而望·如人拋擲散錢者·妻持竹畚入·漫貯十餘錢·方持行·已滿畚矣·小兒女用它器物拾取·莫不然·良久遍其所居·或擲諸小塘·未移時亦滿·其物在室中連日·翁拜而禱曰·貧賤如此·天賜之金·已過所望·願神明亟還·無為驚動鄉閭·使召大禍·至暮·不復見·而柱下踴一牛頭·搖耳動目·儼然如生·明日乃寂·然程氏由此富贍·每歲必以正月十六日·設齋飯緇黃·名曰龍會齋·翁頗能振施貧乏·裡人目為程佛子·紹興二十九年·壽八十三歲而卒·其孫亦讀書應舉·

芝山鬼

芝山在城北一里·左右前後皆墓域·僧寺兩廡·菴柩相望·風雪陰雨·輒聞啾啾之聲·蓋鬼區也·紹興十六年·通判任良臣伯顯喪子·入寺設水陸·夜未半·闔寺聞山下人戲笑往來·交相問勞·程祠部守墓僕·自支徑黃泥路口歸·逢三人同行·厲聲曰·吾輩以寺中會集·見召而往·汝何為者·而敢至此·追逐欲歐之·僕奔竄·適有篝火從寺出者·乃得脫·

葉伯益

浮梁程士廓宏遠幹道三年·自秘·書丞罷歸·妻有娠臨月·其弟宏父·如景德鎮·十二月十五夜·夢葉伯益謙亭舍人訪其居·求一室寄跡·宏父曰·兄弟宴居處不甚潔·獨士廓新治書齋為勝·君試觀之·相隨而入·見供張華潔·如宿辦者·喜曰·此中便可久留·吾得之足矣·共坐索飯·且求火肉·火肉·鄉饌也·伯益生時固嗜此·索之諸房·又得於士廓位·既具饌·客飽食就枕·宏父夢覺·明日還家·道遇僕至·報士廓妻得子·因名之曰亨孫·時伯益物故·恰三年矣·

李生蟲瘤

浮梁李生·得背癢疾·隱起如覆盂·無所痛苦·唯奇癢不可忍·飲食日以削·無能識其為何病·醫者秦德立·見之·曰·此蟲瘤也·吾能治之·取藥傅其上·又涂一綿帶繞其圍·經夕瘤破·出蟲鬥許·皆蠹蠕能行動·即日體輕·但一小竅如箸·端不合·時時蟲湧出不勝計·竟死·予記唐小說載賈魏公鎮滑台日·州民病死·魏公雲·世間無藥可療·唯千年木梳燒灰·及黃龍浴水·乃能治爾·正與此同·

錢為鼠鳴

吾鄉里昔有小民·樸鈍無它技·唯與人傭力·受直族祖家·日以三十錢顧之舂穀·凡歲餘·得錢十四千·置於床隅·戒妻子不得輒用·每旦起·簷玩摩拊·乃出·一夕寢不寐·群鼠鳴於旁·拊床逐之·不止·吹燈照索·無物也·燈滅復然·擾擾通夕·蚤起·意間殊不樂·信步門外·正遇兩人相歐鬥·折齒流血·四旁無人·遂指以為證·里胥捕送縣·皆入獄·民固愚·莫知其爭端·不能答一辭·受杖而歸·凡道途與胥吏之費·積鏹如洗矣·

張二子